

巧克力女孩

陳小燕

角色

阿美：盲目跟隨潮流，同時飽受家庭暴力和體形歧視的少女

阿濠：阿美的弟弟，獲母親的溺愛，脾氣暴躁

母親：傳統女性，受重男輕女思想影響，對兒子唯命是從

彩鳳：阿美的同學，因容貌出眾而成為眾人艷羨的對象

其他：肥馬、阿俊、家樂、美寶、糖糖、蓉蓉、小珠

第一幕

家中

阿濠：媽，我間房有一堆污糟衫，幫我洗咗佢，我返嚟唔要見到佢係度。（離開）

母親：阿美，阿媽趕住去剪髮，你幫細佬洗好啲衫同埋掛好佢啦！

阿美：唔好啦，我大把嘢仲未做，你自己洗啦！

母親：我趕住出門，約咗十點剪髮，而家都九點半啦！你就幫細佬洗咗啲衫佢啦！

阿美：（看一看母親的頭髮）你把頭髮又真係要剪吓，好嘞！

阿美：嘩！咁鬼死多衫，唔怪得知叫我洗啦。唔埋嘞，倒晒啲衫入去洗衣機就算。（阿美開機，然後返自己房繼續做功課。）

（數小時後，阿濠回來發現衣服還未掛好，而且衣服佈滿紙巾碎。）

阿濠：（大發雷霆）點解啲衫變成咁㗎？

阿濠：（找不到母親，就直衝阿美的房間）我啲衫係咪你洗，全部衫都黏滿晒紙巾，你洗之前有睇吓個衫袋裡面有冇嘢㗎？

阿美：（怯懦地）冇呀！我諗住你將啲衫放入污衣籃前會拎晒袋裡面啲嘢吓麻，點知你有嘞？

阿濠：你白痴㗎！死肥婆，平時唔見你做嘢？你今日無啦啦洗咩衫，洗到我啲衫咁？肯定好求其洗啦？正死蠢！

（阿濠動手打阿美，拉著她的頭髮，把她的頭撞向衣櫃，用手打她的臉，又用腳踢她的肚。）

阿美：（淚流滿面，感到好無辜，不斷求饒）你唔好再打我啦！我聽日仲要番學㗎！我又唔係故意既！我冇心㗎！

阿濠：你次次都話冇心㗎啦！死肥婆！你賠番啲衫俾我呀！激死我啦！（青筋暴現，隨手拿起阿美房中的書和雜物擲向她）

阿美：你不要再打我啦！我還有很多功課要做㗎！你唔好擺嘢掙部電腦，我啲功課仲未儲存㗎！

阿濠：（用力拍部電腦螢幕）你做嘍鬼功課呀，死白痴，做一世都做唔完啦你，越諗我越激氣！

（阿濠拿阿美的教科書來撕）

阿美：（想搶救課本）你唔好撕我啲書啦！

（阿濠立即把教科書擲向她，又再用腳踢她。阿美用被子蓋著自己縮作一團，雙手保護頭部，不斷哭泣。）

阿濠：你喊呀！你喊大聲啲啦！我最憎聽到你把聲㗎嘞！（阿濠越踢越大力）

（阿美忍住哭聲。阿濠掀開被子，一把拉住阿美的頭髮，把她拖至客廳）

阿濠：你而家攞番掂啲衫佢！我唔要見到啲衫有紙巾碎！

（阿濠再出門離開，母親回來發現家中空無一人，走進廚房，看見阿美滿頭亂髮，全都打結了，呆坐在地上吃巧克力，滿臉都是淚水、鼻水和巧克力，就像小孩一樣。母親一見阿美的模樣，就知她一定又跟弟弟吵架了）

母親：做咩呀，又俾細佬打呀！（扶起阿美至客廳，替她搽藥）佢有冇打到你邊度呀！個衰仔都唔知死，會打傷人㗎嘛！佢返嚟我實鬧佢，你唔好喊啦，去洗個面啦！不過你細佬仲細，有時你咪讓吓佢，忍一忍佢囉。

（阿美握緊拳頭，沒有回答母親，只是感到很悲哀）

（母親一人在客廳。阿美回房收拾房間，發現阿濠把她一直以來收集的宋純美剪報和相片都翻了出來）

阿美：（拿起照片）如果我喺你就好，人又靚又瘦，唱歌好聽又受歡迎，男朋友仲要係宇宙第一大型男曾秀仁，唉，真係惹人妒忌！

阿美：（收拾房間，看到月曆）原來聽日就喺情人節，掛住做功課都唔記得。

阿美：（走到廚房）好彩我一早買定朱古力，等我溶咗佢整個心形朱古力先得送俾阿俊先得。（傻笑）

阿濠：（看到阿美在弄巧克力）正白痴！呢個年代邊度仲有人自己親手做朱古力？你唔喺好唔得閒㗎咩？有時間做朱古力，冇時間幫我洗衫？咪話我唔提醒你，啲朱古力你都係留番俾你自己食，反正一定唔會有人鍾意肥豬，人獸戀咩！醜女都可以鍾意人㗎？唔知自己醜，就搵盤水照吓，連背面都會嚇親人，肥到成隻河馬咁，甲組腳、廿八層胃脘，唔知醜！邊個收到你盒朱古力就注定倒楣，呢世都有好運行。（阿濠罵完，喝水，伸一伸懶腰，離開）

阿美：（對著阿濠的背影扮鬼臉）你先至喺全世界最恐怖既大魔頭！我詛咒你往後八十年都冇人送朱古力俾你，正白痴！阿俊聽日收到我盒朱古力實好開心。

第二幕

教室

（阿美左看看右望望，故意裝作正在找東西，心想你們快走快走啦。確定其他同學都出外午膳，偷偷從書包中拿出她親手做的巧克力。）

阿美：藍色的包裝紙，黑色的緞帶，全部都係阿俊鍾意既顏色。今朝成朝都想搵機會親手交俾佢，但係肥馬同家樂總係好似阿俊既保鏢咁，一日到黑都喺阿俊身邊，兩個阻住晒，唉！而家唯有將朱古力放喺佢櫃桶度。

阿美：（走到阿俊的座位，坐在他的椅子，伏在他的桌子上，摸一摸桌面）好想變做阿俊張枱，咁樣日日都可以同佢喺埋一齊。唔變枱變做佢張櫈、佢個書包都唔錯。唔得嘅話，至少坐喺佢隔離都好，都唔知啲老師點編座位，同阿俊同班五年，編嚟編去，都有機會坐喺佢隔離，激死人！

（把巧克力放在他的抽屜裡，阿美就走了。但她由始至終都沒有發現她所做的一切都落入彩鳳的眼中。彩鳳待阿美離開後，從阿俊的抽屜裡拿出阿美的巧克力）

彩鳳：（看到藍色跟黑色的包裝）阿美白痴㗎？藍色同黑色既包裝？今日係情人節嘢？送葬咩？我盒朱古力就唔同，心形既盒，粉紅色絲帶，完美既組盒。阿俊收到我盒朱古力實好開心。（把自己的放進阿俊的抽屜裡）

彩鳳：等我扔咗阿美盒朱古力先得。（看一看肥馬的桌子）唔好，等我大發慈悲，做一日愛神邱比特。（把阿美的巧克力放進肥馬的抽屜裡）

（午膳後阿俊回來，阿美引頸以待，希望看到阿俊收到巧克力的反應。）

阿美：（低吟）快啲睇吓櫃桶啦！快啲睇啦！

彩鳳：（看到阿美期待的表情）哈哈！美寶，你睇吓阿美，佢塊面漲到紅卜卜，好似便秘。哈哈！

（阿俊和肥馬同時發現抽屜裡的巧克力）

肥馬：（誇張地大喊）你哋睇！我收到朱古力呀！

阿美：（大吃一驚，站起來）吓，點會咁㗎？（發現一些同學用奇異的眼神看著她，又坐下垂下頭）

（阿俊拿著朱古力，一臉尷尬地望一望蓉蓉，蓉蓉對阿俊露出兇狠的表情，阿俊又轉過頭望一望彩鳳，彩鳳向阿俊露齒一笑。）

家樂：（開玩笑地）阿俊收到巧克力我一啲都唔驚訝，但係點解連肥馬都會有？你哋估吓係邊個送既？

（不知怎的，大家都不約而同望向阿美這兒。）

阿美：（惱羞成惱）唔係我呀！

（她再也坐不下去，衝進其中一格洗手間中哭泣）

阿美：個個都係咁！鍾意亂點鴛鴦譜，係都要話我同肥馬係一對，蓉蓉夠肥啦，又唔話肥馬同佢係一對，我最憎咁樣，唔通肥人淨係可以同肥人一齊咩？成日亂咁講，萬一阿俊誤會我同肥馬就慘。唉！我明明將盒朱古力放喺阿俊個櫃桶度，點解而家會變成肥馬㗎？唔通我放錯咗？（阿美聽到有人進來洗手間，深怕被人發現，立即忍住抽泣聲。）

彩鳳：（拉著美寶的手）頭先你有冇睇到？阿俊佢拎住我盒朱古力！仲望住我，哈哈！

美寶：你睇吓你，貴為班花，居然走去暗戀人，真係笑大人個口呀！

彩鳳：點解我唔可以暗戀人，嚟你唔知喺呢個世界上，美女是喺有特權㗎咩？你估好似某啲豬扒咁，不自量力咩！

美寶：你講邊個呀？

彩鳳：你知唔知係邊個送朱古力俾肥馬？

美寶：我真係唔知，肥馬佢又樣衰又自大，勁乞人憎，我諗嚟諗去都諗唔到有邊個會鍾意佢？

（彩鳳引不住笑了出來）

美寶：又咩咁好笑啫？

彩鳳：你唔好話俾人聽呀，其實盒朱古力喺我放喺肥馬個櫃桶度。

美寶：吓！唔喺麻？你特登買多盒朱古力嚟整蠱肥馬？

彩鳳：根係唔係啦！盒朱古力係阿美嘍，包得勁肉酸。佢都唔搵塊鏡照吓，居然想送朱古力俾阿俊，諗起都覺得噁心。反正阿俊一定唔會鍾意佢，我咪將佢盒朱古力放喺肥馬個櫃桶度咯。佢兩個襯到絕啦，豬扒搭牛扒，絕配。而家諗番起掂過佢盒朱古力，都覺得隻手油膩膩，好似佢啲肥膏黏晒喺上面咁。

美寶：（大笑起來）佢兩個又真係幾襯既，肥嘟嘟又遲鈍。你有冇留意阿美上體育堂嗰時，啲肥肉喺度彈彈吓，條運動褲仲迫到好似隨時爆開，對腳仲粗過大象，好得人驚！

彩鳳：所以上體育堂咪冇人肯同佢一組囉，同佢一組考試實肥佬。我最曾肥人，諗起同阿美讀同一班，就好似隨時會俾佢傳染發福咁，超恐怖。

美寶：不過你唔怕阿美會知道係你放佢盒朱古力喺肥馬個櫃桶度咩？

彩鳳：怕咩怕，就算俾佢知道又點啫。驚佢有牙呀？阿美佢咁鬼細膽，做得啲咩出來呀？

（阿美待兩人離開以後才出來）

阿美：（滿面淚痕，她望著鏡子，握緊拳頭）肥有罪咩？你估我想咁肥嘍？我夠想似宋純美咁瘦，（看到鏡中的自己）我憎死你！憎死你！憎死你！你去死啦！全世界都睇你唔順眼。你聽唔聽到人哋講嘍呀，你係塊豬扒咋，人頭豬腦，不自量力，阿俊佢一定都係咁諗。嗚嗚……（阿美大力打自己一巴）我發誓我一定要減肥成功，變得比彩鳳仲瘦仲瘦！

第三幕

家中

（阿美回到家，看到廚房還有昨天做剩的巧克力，想起昨天在弄巧克力的時候是如何期待，她就覺得好悲哀）

阿美：我真係好傻，尋日仲咁開心喺度整朱古力，結果根本冇人想要，（肚子響起來）好肚餓，冇人要我就食晒佢！（拿起巧克力來吃，一塊又塊，淚又流下來）

阿濠：（回來看到她在吃昨天弄的巧克力，又滿面是淚，就猜到是怎麼一回事）喊！喊！喊！一日到黑淨係識得喊！尋日都話咗你唔駛送朱古力俾人嚟啦！肥到成隻豬咁，食！食！食！淨係識得食！見到你就討厭！（罵完阿濠走進自己的房間）

阿美：（氣極了，又把兩塊巧克力拋進口）就係因為你，我先至變到咁肥，你鬧咩！你越鬧，我就越食得多。正衰人！我真係恨不得殺咗你，（又吃兩塊）反正我做嘢都唔啱，肥就注定失敗，個個都一樣睇唔起我。（越想越氣，阿美把所有巧克力都吃掉）

（回到自己的房間，阿美看到宋純美的照片，見到她纖瘦的身段，忽然感到很內疚）

阿美：唔得！我要瘦！要嘔番啲朱古力出嚟先得。我唔可以再俾人笑！我要瘦！我要瘦！我要瘦！（衝到洗手間，把手指伸進嘴裡，不停地挖，直到想嘔吐為此，她把剛才的巧克力都嘔了出來，但是那些嘔吐物也湧到她的鼻子裡，她想咳嗽，但是滿口滿手都是穢物）

阿美：好邋邋，好辛苦！（洗一洗手，抹一抹鼻子，漱一漱口，再清理四周）

阿美：可能頭先仲未嘔晒出嚟！等我再嘔多一次先得。（再用手指不停地挖，但是這一次卻沒有吐出什麼來）

阿美：嘍已經嘔晒出嚟？等我照吓鏡先得。

阿美：（照一照鏡子）好似真係即刻瘦咗一啲。好！今天晚上一定要忍住不吃晚飯，如果唔係頭先嘔出來啲朱古力就太浪費。

（母親回來，煮好晚飯，見阿美還沒有出來，感到好奇怪。母親敲一敲阿美的房門）

母親：阿美，煮好晚飯啦，出嚟食啦！

阿美：我今晚唔食嘞，你哋食啦！

母親：你係唔係唔舒服呀，今晚煮咗你鍾意既酸甜排骨嗎？

阿美：唔係呀，我……我太睏啦，所以食唔咯。

阿濠：喂！過嚟幫我添飯啦！你駛嘍理佢呀，佢咁大份，你估佢食少一餐半餐會死咩。快啲過嚟幫我添飯仲好啦。

（阿美一聽到阿濠的話，就更有決心要堅持下去）

阿美：媽，你唔駛理我，你快啲幫佢添飯啦！

阿美：（睡在床上手拿雜誌）等我搵下有咩減肥方法先。橫掃日韓超高收視劇集〈肥嘟嘟美人〉明香港首播勢必掀起熱潮，主角唐芯芯獨家專訪。唐芯芯，嚟水嚟嚟？嘩！咁肥嘅，好肉酸。（翻到下一頁）啱晒，減肥方法大揭秘。辣椒減肥法，每一餐都食辣椒，諗吓都覺得好辣，唔得。方食肉減肥法，只能吃肉，禁止進食一切蔬果及五穀類食物，咁咪好容易便秘，咪攞！星座血型減肥法，有冇有效嘍？仲有冇其他方法呢？

阿美：（看到雜誌裡的纖體廣告）欣兒勁減一百磅，修身堂「一定得」減肥計劃，收費三萬五，太貴啦！有冇平啲嘍？皇室纖形，三萬。減肥堂，兩萬五。全部都要幾萬，唔駛諗啦！

（阿美把雜誌扔在一旁，她在房中踱步）

阿美：要儲錢咪要好耐先瘦到？有冇其他又快又平嘅方法呢？

阿美：（看到電腦）上網搵吓仲有咩減肥方法仲好啦！

阿美：（坐在電腦前）減肥日記，自助減肥經驗分享。減肥餐單，早餐西柚一個、麵包一片，午餐西柚一個、番茄三隻，晚餐蔬菜湯一碗。以上餐單重複七天便能瘦三磅。好簡單啫！就咁啦！

阿美：（拿起宋純美的照片）我一定要變成你。

第四幕

課室

小珠：（捏一捏阿美的手臂）阿美，你呢排好似瘦咗嘍？

蓉蓉：你冇事咁麻？係咪唔舒服呀？

阿美：（喜形於色）我冇事。我呢排節食減肥，所以瘦咗少少啫。

小珠：唔怪得知你呢排都唔同我哋一齊食飯啦。

蓉蓉：節食，咁咪好肚饑？阿美你都唔係肥我少少啫，駛嘍減肥。

阿美：（十分激動）肥你少少？蓉蓉，就係肥少少都死。你睇下我隻手臂幾粗，又冇腰，行步路都流晒汗，再唔瘦我呢世就玩完。

小珠：阿美，我支持你。蓉蓉，我覺得唔單只阿美要減肥，你都應該同阿美一齊瘦身就差唔多。你睇吓你呢排又肥咗幾多，食嘢冇啲節制。

蓉蓉：你理得我，肥先至好，冬天唔怕凍，我最怕嗰啲瘦到得番排骨嘅人，我似一陣風都可以吹走，我一啲都唔覺得咁樣叫做靚。而且食得是福，我鍾意食咩就食咩，唔駛好似你哋咁下下都要就住就住，連飲杯茶都要計下有幾多卡路里。（肚子響起來）我又肚餓，買啲嘢嚟食先得。（離開）

糖糖：你哋喺度傾緊啲嘍呀？

小珠：冇，講緊減肥，你覺唔覺得阿美佢瘦咗呀？

糖糖：唔講唔覺，好似真係瘦咗少少，阿美嘍你減肥咩？我都係嘍。

阿美：咁你用咩方法減肥呀？節食？減肥藥？定係食代餐呀？你知唔知有咩方法可以瘦得快啲呀？

糖糖：我都有節食，不過都會每日做一個鐘頭運動嚟減肥，淨係節食減得好慢㗎，一定要同時做埋運動先瘦得快㗎。

阿美：做運動咁辛苦，平時上體育堂要跑兩步都唔想跑，仲要做運動嚟減肥，咪攞！

小珠：咪就係！駛嘍做運動㗎，食減肥藥仲瘦得仲快啦。我食開嗰隻減肥藥超有效，食咗佢唔駛食嘢都會覺得飽。

阿美：唔怪得知你咁瘦啦，原來你食減肥藥嚟減肥，係咪真係瘦得好快？如果係我都想試吓。

糖糖：啲藥安唔安全㗎？我今朝睇新聞先話新加坡有個女明星食減肥藥食到肝衰竭，大陸又有減肥藥食死人。

小珠：佢哋亂咁食先攞成咁啫，我先唔會。而且嗰隻減肥藥係彩鳳介紹俾我，佢同我都有事，點會食死人㗎？

阿美、糖糖：（十分震驚）原來彩鳳佢都有食減肥藥㗎？

小珠：有嘍咁出奇，而家十個女仔，不論肥瘦，十個都減肥㗎啦。

糖糖：但係聽人哋講話食減肥藥好容易會食上癮，好似好唔安全咁。

小珠：上癮有嘍所謂，瘦到咪得囉。阿美，你係咪有冇興趣，如果我哋一齊訂可以擺到折扣優惠再平啲。糖糖，你買唔買呀？

糖糖：減肥藥？都係唔好嘞，我寧願食少啲嘢，做多啲運動仲好。

（彩鳳走進課室，三人不若而同看著她）

小珠：彩鳳真係又瘦又靚，你睇下佢對腳，超幼。

糖糖：啲減肥藥都係預埋我嗰份。

第五幕

家中

（阿美睡在床上，母親坐在側，拉著阿美的手）

母親：老師話你係學校暈倒，你呢排攞嘍鬼呀？成個人落晒形，瘦到成枝竹咁。星期六、日又唔出街，日日返嚟瞓喺張床就郁都唔郁，你係咪減肥呀？

阿美：梗係唔係啦，我讀書讀得辛苦之麻，咪冇咩胃口囉，今日趕住出門，冇食早餐，上體育堂咁啱又要跑圈，所以先餓過頭暈倒。

（房外傳來阿濠的叫喊聲）

阿濠：媽！添飯！

母親：得啦！等一等！（望著阿美）你咁大個人，阿媽唔得閒時時睇住你，你要識得照顧自己先得。

阿美：（轉過背去）得啦。

（房外又傳來阿濠的叫喊聲）

阿濠：媽！添飯！

母親：阿媽煲咗白粥俾你，你瞓多陣就起身嚟食啦。（離開）

阿美：根係啲減肥藥唔夠勁，先至會餓暈，聽日要將減肥藥嘅份量加倍先得。

（半夜阿美起來）

阿美：等我倒咗啲粥先，（肚子在這時響起來）我好飽！我唔肚餓！我好飽！我唔肚餓……（把所有粥倒掉，再吃四顆減肥藥）

阿美：做運動瘦得快啲，跳下繩先得。（想跳繩，卻發現心跳得很快，頭暈目眩，冒冷汗，拿著繩的雙手不住的打擅，而且想吐）好辛苦，好暈。唔得，我一定要

再瘦啲，再瘦啲，再瘦啲……（阿美跳繩）一、二、三、四、五、六……

（一直跳，直到一個小時後）

阿美：（滿頭大汗）冇力嘞，手同腳都有晒感覺。（走進浴室洗澡）

阿美：（上磅）磅一磅先，二十八公斤，要再瘦啲先得。（又用軟尺量一量手臂圍）阿美：六吋半，很粗。（又再量一量腰圍和大脾圍）

阿美：點解一啲都有瘦，激死人！激死人！激死人……（流下淚來）

阿美：（整個身子浸在熱水裡，然後不段捏著肚皮的不同部分）等我搵走你先得。阿美：（閉上眼睛）如果人一出生世全部都係盲嘅，又或者冇美醜之分就好。點解有啲人天生麗質，有啲人就要為美麗而付出努力，真係唔公平，上帝一定係陰陽面，討厭鬼。（想著，想著，她把整個人都沉在水裡）

課室

小珠：你覺唔覺得阿美呢排好怪，同佢傾計，除咗減肥之外，根本冇辦法同佢講其他嘢！又成日無端端發脾氣唔采人。

糖糖：係啦！佢以前都唔係咁嘅，而家開口埋口都係減肥，仲到處同人講點樣減，好煩呀！

小珠：咪就係，而家人人趕住去增肥，佢就仲係停留喺減肥，超 out！

糖糖：係啦！佢次次都慢人半拍㗎啦。呢排佢成日面青青又有嚟精神，日日伏喺張枱度，連行樓梯都有力咁。好恐怖！好似隨時會斷氣咁。

小珠：點只呀！你有冇留意到佢啲指甲，全部都又黃又斷到一截截，好核突。

（阿美走到兩人之間）

糖糖：阿美，你有事吖麻？尋日真係俾你嚇死。

阿美：我有事，餓得滯先暈啫。

小珠：你而家仲節食減肥？

阿美：係呀，我仲有好多肥肉都未減走，至少都要瘦到宋純美咁啦。

糖糖：仲係宋純美？佢而家都唔紅啦。而且你今日冇睇報紙咩？曾秀仁飛咗佢同唐芯芯埋一齊，而家唔興瘦，興胖美人，肥先至潮，你仲節食嚟做嘍咩。

阿美：吓？你講笑咋？唐芯芯咁肥，宋純美靚佢好多，曾秀仁點會為咗唐芯芯而飛咗純美？

糖糖：嚟你有睇唐芯芯做個套〈肥嘟嘟美人〉咩，超暴笑，劇情又感人，芯芯肥嘟嘟好可愛，我係曾秀仁都揀佢唔要宋純美啦。排骨精，抱住佢都唔方舒服得去邊，芯芯就唔同，抱住佢一定軟綿綿好得意，我都想變成佢咁。

（蓉蓉和阿俊一起走進課室）

小珠：你哋知唔知我尋日放學見到啲咩呀？

糖糖：你唔講梗係唔知啦。見倒啲咩啫？

小珠：蓉蓉同阿俊一齊地住手走人。

阿美：咩話？你話佢兩個拍緊拖？你眼花咋？

小珠：我眼花？珍珠都有咁真。

糖糖：我一早都覺得佢兩個有啲唔妥，成眉來眼去，打情罵俏，原來佢兩個攞地下情。

（阿美望著蓉蓉和阿俊）

阿美：今日晏晝我哋喺邊度食，你知唔知有咩方法可以肥快啲？

完